

## **Kapisilinniarneq pillugu Namminersorlutik Oqartussat nalunaarutaat nr. 33, 30. juli 2021-mersooq**

Aalisarneq pillugu Inatsisartut inatsisaanni nr. 18, 31. oktober 1996-imeersumi §§ 5, 8, aamma 10, § 10a-mi imm. 1, § 13, imm. 2, §§ 23, 25, aamma 26, § 33-mi, imm. 2 aamma § 34, imm. 3, kingullermillu Inatsisartut inatsisaatigut nr. 28, 28. november 2016-imeersukkut allanngortinneqartoq naapertorlugit aalajangersarneqarpoq:

### **Kapitali 1**

#### *Atuuffia atuuffigisaanullu nassuiaatit*

#### *Atuuffia*

**§ 1.** Nalunaarut una Kalaallit Nunaata aalisarnikkut oqartussaaffigisaani kapisilinniarnermut atuuppoq:

- 1) Nunap Isuata kitaani NAFO-p sumiiffilersuiffiani 1. Tunngaviusumik killigitimit 40 sømilit avataanni kapisilinniarneq inerteqqutaavoq.
- 2) Kalaallit Nunaata Kangiata aalisarfiini. Taamaattorli paragraffit tulliuttut kisimik atuutissapput, tassalu: § 6, § 7, § 8, § 9, § 10, § 11, § 12, § 13, § 14, § 15 aamma § 16. Tunngaviusumik killigitimit 12 sømilit avataanni kapisilinniarneq inerteqqutaavoq.
- 3) Kapisillit kuuani kapisilinniarnermi.

#### *Nassuiaatit*

**§ 2.** Nalunaarummi matumani Inuussutissarsiutigalugu aalisarneq paasineqassaaq pisat tamaasa ilaannaasaluunniit tuniniarnissaat siunertaralugu aalisarnertut.

*Imm. 2.* Inuussutissarsiummut atatinnagu kapisilinniarneq nalunaarummi matumani paasineqassaaq nammineq atugassanik kapisilinniarnertut.

*Imm. 3.* Kapisilinnik pisineq nalunaarummi matumani paasineqassaaq inunnit kapisilinniarnissamut akuersissummik allagartaqartunit toqqaannartumik pisineq tigusinerlu.

### **Kapitali 2**

*Inuussutissarsiutigalugu kapisilinniarnermut piumasaqaatit*

§ 3. Inuussutissarsiutigalugu kapisilinniarnissamut akuersissummik allagartallit kisimik nalunaarutip atuuffigisaani pisarineqarsimasunik kapisilinnik tuniniaasinnaatitaapput.

§ 4. Inuussutissarsiutigalugu kapisilinniarsinnaanermut allagartat akuersissutit qinnuteqareermermi Naalackersuisunit tunniunneqartut piumasaqaataapput.

*Imm. 2.* Aalisarsinnaanermut akuersissut qinnuteqartunut piumasaqaatinik makkuningga naammassinnittunut taamaallaat tunniussisoqarsinnaavoq:

- 1) Qinnuteqartoq inuiaqatigiinnut kalaallinut aalajangersimasumik attuumassuteqartuussaaq, aalisarneq pillugu Inatsisartut inatsisaanni § 3-mi, imm. 4 naapertorlugu.
- 2) Inuussutissarsiutigalugu aalisarsinnaanermut piumasaqaatit Inatsisartut aalisarneq pillugu inatsisaat § 6, imm. 3, naapertorlugu naammassinnissimassapput.
- 3) Qassutitik kapisilinniutitik aamma angallammik kapisilinniummik 12,8 meterit (42 fod) tikillugit tamakkerlugu takissusilimmik qinnuteqartup nammineq pigisaqarnissaa.
- 4) Qinnuteqarnermut atatillugu qinnuteqartumit pigineqartut qassutit kapisilinniutit qassiunerinik qanorlu ittuunerinik imaluunniit ilisarnaataannik qinnuteqartoq ilisimatitsissaaq.
- 5) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaataaneq pillugu § 9 aamma § 16 naapertorlugu naammassinnissimassapput.

*Inuussutissarsiutigalugu kapisilinniarnermi piniutit*

§ 5. Uku taamaallaat atorlugit inuussutissarsiutigalugu kapisilinniartoqarsinnaavoq:

- 1) qarsorsat, imaluunniit
- 2) qassutit 20-t tikillugit tasillugit minnerpaamik 140 mm-inik nigartallit atorlugit aamma taakkunanit amerlanerpaamik qassutit 5-t imminnut qilersimasinnaapput.

*Imm. 2.* Qassutit nigartaat uuttorneqassapput uuttuutit ½ kilomik oqimaalutserlugu nigartamut ikkuneratigut nakkartinneratigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi, nr. 2-mi piumasaqaat eqqortissavaat.

*Imm. 3.* Qassutit kapisilinniutit atorneqartut tamarmik piginnittup aqqanik imaluunniit taassuma angallataata aqqanik normuanillu nalunaaqutsersugaassapput. Nalunaaqutsiussat imermit arortinneqarsinnaassanngillat.

*Imm. 4.* Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat uumanissaminnut periarfissaat ajornerulertussaajunnaarlugit.

## *Inuussutissarsiutigalugu kapisilinniarnep aaqqissuussaana*

§ 6. Inuussutissarsiutigalugu kapisilinniarnep pisassiissutit aallaavigalugit nunami tunitsivinnut tunisassanik imaluunniit najukkani kalaalimineerniarfennut najukkamilu suliffeqarfennut tuniniarneqartussanik aalisarnertut ingerlanneqarsinnaavoq.

§ 7. Inuussutissarsiutigalugu aalisarnermut Naalakkersuisut ukiut tamaasa, nunat tamalaat akornanni isumaqatigiissutit eqqarsaatigalugit, Kalaallit Nunaanni kapisilittassanik aalajangersaassapput.

*Imm. 2.* Naalakkersuisut KNAPK-lu isumasioqatigereerlugu inuussutissarsiutigalugu kapisilinniarnissamut ulloq aallartiffissaq aalajangertassavaat. Ulloq aallartiffissaq nuna tamakkerlugu tusagassiutit aqutigalugit nalunaarutigineqartassaaq.

*Imm. 3.* Inuussutissarsiutigalugu kapisilinniarnermut pisat Kalaallit Nunaata avataani taamaallaat pisiariorneqarsinnaapput tuniniarneqarsinnaallutillu Naalakkersuisut akuersissuteqarnerisigut.

§ 8. Pisassiissutit tamakkerlugit pisarineqarnissaat qanillippat, Naalakkersuisut nalunaarutigissavaat, qaqugu inuussutissarsiutigalugu kapisilinniarnep kiisalu taamatut aalisarnermut pisanik pisineq aamma tunisineq unissanersoq. Nuna tamakkerlugu tusagassiutit aqutigalugit nalunaarutigineqassaaq.

## *Inuussutissarsiutigalugu kapisilinniarnermut pisanik nalunaaruteqarneq*

§ 9. Kapisillit pisarineqartut tamarmik Kalaallit Nunaanni Aalisarnermik Akuersissutinik Nakkutilliisoqarfimmu (KANUAANA) erngertumik nalunaarutigineqartassapput.

*Imm. 2.* Inuussutissarsiutigalugu aalisarnissamut akuersissutillit kalaalimineerniarfinni toqqaannaq tunisartut kapisilinnik tulaassinerit tamaasa nalunaaruteqartassapput. Nalunaaruteqarnermi kapisillit pisat tulaanneqartut tamarmik ilaatinneqassapput. Nalunaaruteqarneq ilanngussaq 1 naapertorlugu paasissutissanik tamanik imaqassaaq aamma tamanna Sullissivik.gl aqutigalugu imaluunniit KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl-mut nalunaaruteqarnikkut.

## **Kapitali 3**

*Inuussutissarsiutiginagu kapisilinniarnep Inuussutissarsiutiginagu kapisilinniarnermut piumasaqaatit*

§ 10. Inuussutissarsiutiginagu kapisilinniarnissamut akuersissut qinnuteqareernikkut

Naalackersuisunit tunniunneqartassaaq.

*Imm. 2.* Imm. 1 malillugu qinnuteqartunut piomasaaqatinik makkuninnga naammassinnittunut taamaallaat akuersissutinik tunniussisoqarsinnaavoq:

- 1) Aalisarnej pillugu Inatsisartut Inatsisaanni § 8-mi, imm. 1-imi piomasaaqatinik naammassinnissimasut.
- 2) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaataaneq § 15 aamma § 16 naapertorlugit naammassinnissimasunut.

#### *Inuussutissarsiutiginagu kapisilinniarnermi piniutit*

**§ 11.** Uku taamaallaat atorlugit inuussutissarsiutiginagu kapisilinniartoqarsinnaavoq:

- 1) qarsorsat, imaluunniit
- 2) qassutit (ataatsit) 2000-nik qilernillit, taakkua tasillugit nigartaat minnerpaamik 140 mm-iusut.

*Imm. 2.* Qassutit nigartaat uuttorneqassapput uuttuutit ½ kilomik oqimaalutserlugu nigartamut ikkuneratigut nakkartinneratigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi, nr. 2-mi piomasaaqat eqqortissavaat.

*Imm. 3.* Qassutit piginnittup atii tamaasa ilanngullugit nalunaaqutsigaassapput. Nalunaaqutsiussat imermit arrortinneqarsinnaassanngillat.

*Imm. 4.* Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat atorluarneqarsinnaanissaat ajornerulerseqqunagit.

#### *Inuussutissarsiutiginagu kapisilinniarnernup aaqqissuusaanera*

**§ 12.** Inuussutissarsiutiginagu kapisilinniarneq pisassiissuteqarnikkut ingerlanneqarsinnaavoq.

**§ 13.** Inuussutissarsiutiginagu kapisilinniarnermut, Naalackersuisut ukiut tamaasa nunat tamalaat akornanni isumaqatigiissutit naapertorlugit kalaallit kapisilittassaannik aalajangersaassapput.

*Imm. 2.* Inuussutissarsiutiginagu kapisilinniarneq inuussutissarsiutigalugu kapisilinniarnernup aallarteqatigissavaa, § 7, imm. 2 naapertorlugu.

**§ 14.** Kapisilittassiissutit aalajangikkat tamakkerlugit pisarineqarnissaat qanillippat, Naalackersuisut nalunaarutigissavaat, qaqugu inuussutissarsiutiginagu kapisilinniarneq unitsinneqassanersoq. Nuna tamakkerlugu tusagassiutit aqqutigalugit nalunaarutigineqassaaq.

#### *Inuussutissarsiutiginagu kapisilinniarnermi pisanik nalunaaruteqarneq*

**§ 15.** Inuussutissarsiutigiginagu kapisilinniarnermi kapisillit pisarineqartut tamarmik KANUAANA-mut nalunaarutigineqassapput.

*Imm. 2.* Pisat pillugit nalunaarutiginninneq nalunaarummi ilanngussaq 1 imaluunniit Sullissivik.gl aqutugalugu pisassaaq. Kapisilinnik qassutinik napitaajaanerup kingornatigut, § 11, imm. 4 naapertorlugu nalunaarutiginninneq apuutereermermi erngertumik uunga nassiunneqartassaaq: KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl.

## **Kapitali 4**

*Inuussutissarsiutigalugu inuussutissarsiutigiginagulu kapisilinniarnermi pisaqanngitsoornernik 0-imik nalunaaruteqarneq*

**§ 16.** Inuussutissarsiutigalugu inuussutissarsiutigiginagulu kapisilinniarnissamut akuersissutaatillit tamarmik kapisilinniarsimangitsut tamanna pillugu ilanngussaq 1 atorlugu nalunaarutigissavaat.

*Imm. 2.* Inuussutissarsiutigalugu inuussutissarsiutigiginagulu kapisilinniarnissamut akuersissutaatillit tamarmik kapisilinniarsimasut tamanna pillugu ilanngussaq 1 atorlugu nalunaarutigissavaat.

*Imm. 3.* Akuersissutinik atorneqanngitsunik aamma pisaqanngitsoornernik nalunaaruteqarneq nalunaarummut ilanngussaq 1 aqutugalugu pissaaq. Nalunaaruteqarneq kingusinnerpaamik kapisilinniarnernerup matuneraniit ullut 14-init kingorna KANUAANA-mut, Postboks 501, 3900 Nuuk, Telefax 34 63 60 atorlugu imaluunniit e-mail gflk@nanoq.gl atorlugu nassiunneqassaaq.

## **Kapitali 5**

*Kapisillit kuuani kapisilinniarneq*

**§ 17.** Kapisillit Kuuanniit kapisilinniarnermut pisassiissutit aamma ulloq aallartiffissaq ukiut tamaasa Naalakkersuisunit aalajangersarneqartarpoq.

*Imm. 2.* Kapisillit Kuuanni taamaallaat nammineq atugassanik aalisartoqartassaaq. Aalisarnermi tassani piunasaqaataavoq akuersissut qinnuteqareermermi Naalakkersuisunit tunniunneqartassasoq.

*Imm. 3.* Imm. 2 malillugu aalisarsinnaanermut akuersissut qinnuteqartunut piunasaqaatinik makkuninnga naammassinnittunut tunniunneqarsinnaavoq:

- 1) Aalisarneq pillugu Inatsisartut Inatsisaanni § 8, imm. 1-imi piunasaqaatit.
- 2) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaataaneq §§ 15 aamma 16 naapertorlugu naammassinnissimasunut.

*Imm. 4.* Kapisillit Kuuata paavani 1000 meter-imit qaninnerusumut qassuserneq inertequtaavoq.

*Imm. 5.* Kuummi taamaallaat qissattaat ataasiinnarmik qarsorsalik atorlugu aalisartoqarsinnaavoq.

*Imm. 6.* Kapisilittassiissutit tamakkerlugit pisarineqarnissaat qanillippat, qaqugu kapisilinniarneq

unissanersoq nuna tamakkerlugu tusagassiutit aqqutigalugit Naalackersuisunit nalunaarutigineqassaaq. Naalackersuisut aalajangiisnaapput, tamatuma kingorna aalisarnerit tamarmik nalunaaruteqartusaaertalerlugit aalisakkat pisareriarlugit imaanut uterteqqittarlugit aalisarnertut ingerlanneqassasut.

## **Kapitali 6**

### *Pineqaatissiissuteqartarnek*

**§ 18.** Unioqqutitsinerit pinerluttulerinermi inatsimmi malittarisassat naapertorlugit akiliisitsissummik arsaarinnissummilu pineqaatissinneqarsinnaapput § 1-imi, nr. 1-imik aamma nr. 2-mik, §§ 3-mik, aamma 4-mik, § 5-imi, imm. 1-imik, imm. 3-mik aamma imm. 4-mik, § 7-imi, imm. 3-mik, 4-mik aamma 5-imik, § 8-mi, imm. 3-mik, § 9-mik, § 10-mi, imm. 1-imik, § 11-mi, imm. 1-imik, imm. 3-mik, aamma imm. 4-mik, § 13-imi, imm. 3-mik, § 14-imi, imm. 3-mik, aamma §§ 15-imik aamma 16-imik.

*Imm. 2.* Ingerlatseqatigiiffiit il.il. (Inatsisilerinermi immikkoortut inuttut isigineqarsinnaasut) Pinerluttulerinermi inatsimmi kapitel 5 naapertorlugu akisussaatinneqarsinnaapput.

*Imm. 3.* Pinerluttulerinermi inatsimmi arsaarinnittarnek pillugu malittarisassat taamatutaaq atorineqarsinnaapput.

*Imm. 4.* Akiliisitsissutit Nunatta Karsianut pisassanngortinneqassapput.

## **Kapitali 7**

### *Atortuulersitsineq*

**§ 19.** Nalunaarut ulloq 1. august 2021 atuutilissaaq.

*Imm. 2.* Peqatigitillugu Namminersorlutik Oqartussat kapisilinniarnek pillugu nalunaarutaat nr. 32, 28. august 2020-meersoq atorunnaarsinneqassaaq.

*Namminersorlutik Oqartussat, ulloq 30. juuli 2021*

Aqqaluaq B. Egede

Aalisarnermut Pininarnermullu Naalackersuisoq

/ Jørgen Isak Olsen